

## **MAJLIS IKRAR PELAJAR BARU SESI 1998/1999**

Saya ingin mengalu-alukan kedatangan anda semua ke universiti yang indah ini dan kita berhimpun pada pagi ini untuk menyaksikan Majlis Ikrar Pelajar Baru Universiti Malaysia Sabah bagi kali keempat. Sehubungan itu, saya mengambil kesempatan ini untuk mengalu-alukan kehadiran YB Datuk Seri Panglima Khalil Datu Hj. Jamalul, Setiausaha Kerajaan Negeri Sabah mewakili Pengerusi Majlis UMS, Tan Sri Abdul Hamid Egeh, bagi menyempurnakan upacara majlis ikrar ini.

### **Tahniah Pelajar Baru**

Sesungguhnya, dengan penuh perasaan bangga dan sukacita, saya ingin mengucapkan setinggi-tinggi tahniah di atas kejayaan saudara dan saudari diterima melanjutkan pengajian tinggi di UMS. Saudara dan saudari merupakan golongan individu yang amat bertuah. Anggaphlah kejayaan ini sebagai anugerah Tuhan yang penuh hikmah. Pergunakanlah peluang ini untuk mencapai kejayaan serta cita-cita. Untuk makluman, jumlah pelajar yang tidak terpilih memasuki universiti di negara ini adalah tinggi. Oleh itu, saya yakin saudara dan saudari tidak akan mensia-siakan peluang keemasan yang diberikan.

### **Tanggungjawab Pelajar**

Saya amat mengalu-alukan kehadiran saudara dan saudari ke UMS. Sebagai mahasiswa, saya ingin mengingatkan mengenai tanggungjawab sebagai mahasiswa-mahasiswi universiti. Pada hemat saya, terdapat dua tanggungjawab utama yang perlu saudara dan saudari laksanakan.

Tanggungjawab utama mahasiswa sekalian ialah untuk memperolehi serta menguasai ilmu untuk membina keterampilan diri yang komprehensif dan sempurna. Pada alaf baru mendatang, kita akan melihat bagaimana ilmu (*knowledge*) menjadi modal sebenar (*true capital*) dalam masyarakat untuk menghasilkan sumber harta, kemewahan dan kebijaksanaan hidup. Ilmu ialah kuasa (*knowledge is power*). Pekerja yang berilmu dan berketerampilan akan menjadi pemimpin yang berwibawa dan produktif. Ilmu yang diperolehi itu perlulah disaduri dengan etos, nilai etika dan moraliti yang tinggi dan positif.

Pelajar yang berilmu serta memiliki nilai etika dan moraliti diri yang tinggi mampu menjadi pemimpin yang dapat menyumbang secara optimis serta produktif terhadap sistem nilai dan norma masyarakat pada masa hadapan. Harapan universiti agar saudara dan saudari tidak sekali-kali menjadi mahasiswa yang bersifat pesimis terhadap masa hadapan, mengukur diri semata-mata berdasarkan kekayaan harta benda dan status diri, melupakan tanggungjawab kepada keluarga, masyarakat dan negara serta memberikan premium yang terlalu tinggi untuk mendapatkan ijazah yang terbaik. Sebaliknya, universiti mengharapkan agar para mahasiswa meninggalkan sifat akal budi dan sopan santun dalam interaksi sesama keluarga dan masyarakat.

Perkara kedua juga yang menjadi tanggungjawab utama para pelajar ialah membina personaliti dan perwatakan diri yang ampuh dan positif. Di antara ciri-ciri personaliti yang perlu ada pada setiap mahasiswa ialah kesediaan untuk bekerja kuat dan membina kegigihan dan keseronokan yang tinggi untuk belajar. Apabila wujud kegigihan dan keseronokan untuk belajar, saya yakin para pelajar akan memiliki kebolehan spontan, untuk merangsang dan memotivasikan diri serta mampu untuk bersaing menguasai ilmu yang dipelajari.

Di samping itu, saudara dan saudari juga perlu membangunkan empat dimensi diri yang penting iaitu fizikal, mental, spiritual dan emosi. Dari segi fizikal, kesihatan fizikal perlu dijaga dengan makan makanan yang seimbang dan berkhasiat untuk memastikan saudara dan saudari mempunyai tenaga dan stamina yang kuat.

Bagi memperkukuhkan pembangunan mental, saudara dan saudari perlu melakukan latihan mental melalui aktiviti pembacaan dan penulisan kritikal yang banyak. Sementara itu, pembangunan emosi perlu digerakkan melalui proses interaksi dengan rakan sebaya, pensyarah dan orang lain. Perkara ini perlu bagi membina sifat bekerjasama, perpaduan dan toleransi di kalangan pelajar. Sungguhpun begitu, pembangunan *spiritual* merupakan tunggak kepada pembangunan fizikal, mental dan emosi. Ia akan memperkukuhkan kekuatan diri dalam menghadapi tekanan dalam proses pembelajaran.

Akhir kata, dengan kesungguhan saudara dan saudari sekalian untuk memenuhi kedua-dua tanggungjawab utama yang telah dinyatakan tadi, saya yakin saudara dan saudari mampu mencapai kejayaan cemerlang dalam pengajian di universiti dan seterusnya memperolehi kerjaya yang baik pada masa hadapan. Ia juga harus disertakan dengan satu wawasan atau visi. Tanpa visi yang jelas tidak mungkin kejayaan dapat dicapai. Seorang sarjana iaitu Joel Barker pernah berkata:

*Vision without action is merely a dream. Action without a vision just passes the time. Vision with action can change the world.*

---

**Ucapan di Majlis Ikrar Pelajar Baru Sesi 1997/1998 di Auditorium Yayasan Sabah, Kota Kinabalu pada 29 Mei 1998.**